



11. augusti 2016

UKA 2016/67

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara.

**Pisortat pigisaanni innuttaasut namminneerlutik akileeqataanermikkut atuineranni akileeriaatsip siuartinneqarnissaata, tassa qaammatit naanerini akissarsiffimi, ilusilorsornera pillugu UKA 2017-imni Naalakkersuisut saqqummeeqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Anthon Frederiksen, Partii Naleraq)

**Tunngavilersuut:**

Piffissami sivitsortumi kalaaleqatinnguagut ajuusaarnaraluartumik akiligassaminnik piffissaq eqqorlugu akiliineq ajortut naapittarpagut. Taamatut piffissaq eqqorlugu akiliinngitsoortarnerup tunngaviinut ilaavoq akiligassap akilernissaata nalaani akiliutissaqanngittarneq.

Aalajangiiffigisassaq una malillugu qulakkeerniagarput tassaavoq inigisamut, imermut, innaallagissamut imaluunniit meeqgerivinnut akiliisussanngornermi innuttaaqatitta ataasiakkaat akiligassap akilernissaata nalaani akiliutissaqartarnissaat.

Pisortat pigisaanni innuttaasut namminneerlutik akileeqataanermikkut atuineranni akileeriaatsit siuaallatsinneqarsinnaasut taakkartorsinnaasagu arlaqarput.

Imaassinaavoq Nukissiorfinnut a conto, eqqaavinnik anartarfinnillu imaarsineq kommunenit ingerlanneqartoq, imaluunniit meeqgerivinnut akiliutit. Akuttunngitsunimmi tusartarpagut pisortanut akiitsut milliardit missaanii amerlassuseqartut. Ajoraluartumittaaq nalunngilarput ilaqtariippassuit inigisaminniit anisitaasartut amerligaluttuinnartut.

Taamaammat akiitsut amerligaluttuinnartillugit, akiliisinnaassutsillu killeqarnera pissutigalugu, minnerunngitsumillu inuit ilaqtariillu ataasiakkaat

akiitsunikkaluttuinnannginnissaat aammalu pingaartumik inigisamiit anisitaasartut amerligaluttuinnannginnissaat qulakkeerniarlugu, pisortanut akiligassat akilerneqartarnerat nutaaliornikkut aaqqissuussivigisariaqartoq isumaqarpugut. Tassami ilisarnaatigineqakkajuppoq inoqutigiit aningaasaqarnerata iluani akiligassanut akiliutissaarutarneq.

Taamaammat inuit pissaqanngereersut qajassuullugit tunngavigalugillu pisortanut akiitsut sukumiisumik ikilisarneqarnissaannut sakkussanik ujaasiuarnissarput ingerlattuartariaqaripput partii naleqqamit isumaqarpugut.

**Allaffissornikkut aningaasatigullu pisortanut kingunerisinnaasai:**

Naalakkersuisoqarfifit ataasiakkaat nalinginnaasumik suliassanik kivitsinerisa iluini akileeriaatsit siuartinneqarnissaata ilusilersornera aallarniutitut suliarineqarsinnaajumaarpoq. Katiterinermi Aningaasaqarnermut Naalakkersuisoqarfifit allaffimmi inuup ataatsip ukiumut naammassisinnaasaata angeqqataa ataaseq atorneqarnissaa taggipparput.

Tamakkiisumik pisortat missingersuutigeriigaasa iluini suliaq ingerlanneqarsinnaassaaq, aningaasartuuteqarnerusoqariataassappat piffissap sivikitsup iluani imminut akilernissaa ilimagineqarsinnaajumaarpoq.

Naggataagullu pisortanut akiitsut pillugit, pisortat ullunik arlalinnik siusinaarlutik pissarsiarisalissavaat, tamannalu pisortanut aningaasanik tigoriaannaateqarnerup pitsanngoriarneranik ernianullu akilersuinnginnerunermik kinguneqarumaarpoq.

**Allaffissornikkut aningaasatigullu inuiaqatigiinnut kingunerisinnaasai:**

Innuttaaqatigut akiligassat suut qaqqukku akiligassaanersut pillugit oqilisaavigineqassapput. Tassami pisortanut akiligassat tamakkivillutik ullormi akissarsiffimmi akilerneqartarnissaat atuutilertussaassammat. Innuttaasut akiligassanik akiliinnginnerminni aningaasanik tigoriaannaateqarnerat sivikillineqassaaq.

**Allaffissornikkut aningaasatigullu namminersortunut kingunerisinnaasai:**

Namminersortutut ingerlasut pisortanut akiligassat qaqqukkut akilerneqartarnissaat eqqarsaatersuuteqarfigiunnaassavaat. Taamaattorli akiliinngikkallarnerit qimaamineqarpata

suliffeqarfinnut sunniuteqalaarnissaa takorloorneqarsinnaavoq, kisiannili suliffeqarfiiit aqulluarneqartut artornavianngikkaat ilimagineqartariaqassaaq.

**Avatangiisinut kingunerisinnaasai:**

Siunnersuut pinngortitamut toqqaannartumik sunniuteqarnissaa ilimagineqanngilaq.